

Unnuinermi akitsuut pillugu Inatsisartut inatsisaat

Akitsuut

§ 1. Inini, ineqqani, inissiani, illuni, containerini najugaqarfinni, illuaqqani, tuperni assigisaannilu akiliisitsilluni unnuisitsinermut akitsummik akiliisoqassaaq.

Imm. 2. Akitsuut inummut Kalaallit Nunaanni najugaqanngitsumut unnuinermut ataatsimut 30 kr.-iuvoq.

Imm. 3. Imm. 1-imi unnuinermik taaneqartumik akiliisitsilluni neqerooruteqartoq, inatsit una naapertorlugu akitsummik akiliisussaatitaavoq.

Imm. 4. Inuit Kalaallit Nunaanni najugallit akitsummik akiliisussaatitaasup apeqquteqarneratigut Kalaallit Nunaanni najugaqarnermut uppernarsaammik pisariaqartumik takutitsisussaatitaapput.

§ 2. Akitsummik akiliisussap akiliutissamik akiliisitsinerup ilutigisaanik, akitsuut akileqquneqassaaq.

Ilaatinneqanngitsut

§ 3. § 1 tulliuttuni atuutissanngilaq:

1) Akitsummik akiliisussap piffissamut akitsuusiiffiusumut tamakkiisumik akitsummik akiliutaa 600 koruuninit ikinnerusimappata.

2) Inummut suliffeqarfimmulluunniit ataasiinnarmut attartortitsinermi, attartorneq unnunnik 21-nik tulleriinnik sivisunerusimappat.

3) Angallassisup silap ajornera, teknikikkut unammilligassaqarneq assigisaannilluunniit patsiseqartumik inuk illusisippagu, angallassisullu unnuinermut aningasartuut akilerpagu.

Imm. 2. Imm. 1, nr. 2-mi ilaatisinnginneq suliffeqarfinnut attartortitsinermi atuutinngilaq matumani angalatsiviit, angalanernik aaqqissuisartut il.il. attartortitseqqiisartut imaluunniit inunnut unnuiffissanik arlaatigut paassisutisseeqqittartut ilanngullugit, matumani inuk imaluunniit inuit inimik il.il. atuisut unnunnik 21-nik tulleriinnik sivisunerusumik unnuisimanngippata.

Aqutsineq

§ 4. Piffissaq akitsuusiiffik tassaavoq qaammatit pingasukkaat.

Imm. 2. Piffissap akitsuusiiffiup kingorna qaammatip tulliuttup ulluisa aallaqqaataanni akitsuut akilerneqassaaq, qaammatip akiliiffissap qaangiuttup kingorna qaammatip ulluisa aallaqqaataat eqqorlugu kingusinnerpaamik akiliuteqartoqassalluni. Ulloq akiliiffissaq eqqortoq arfininngorneruppat, sapaataappat nalliuutuuppalluunniit piffissarititaasoq ulluinnarmut tullermut sivitsorneqassaaq.

Imm. 3. Akileraartarnermut ingerlatsivimmut akiliuteqartoqassaaq.

§ 5. Akitsuummik akiliisussaatitaasut piffissap akitsuusiiffiusup qaangiunnerata kingorna aamma kingusinnerpaamik qaammatip tulliuttup ulluisa qilinganni paasissutissat nassitissavai, taakku akileraartarnermut ingerlatsiviup innersuussinera malillugu akileraartarnermut ingerlatsivimmut akitsuummik akiliisussaatitaasup kinaassusersinissaanut, qaammammi ataatsimi unnuinerit amerlassusiinut, inuit qassiunerinut akitsuutillu annertussusianik paasiniaanermut atorneqassapput. Paassisutissanik nassiuassinissamut piffissaliussaq kingulleq arfinningorneruppat, sapaataappat nalliuuttupalluunniit piffissaliussaq ulluinnarmut tulliuttumut sivitsorneqassaaq.

Imm. 2. Nassiussinermi immersugassat akileraartarnermut ingerlatsiviup suliarinikuusai, matumani digitalisut ilusillit ilanggullugit, atorneqassapput.

Imm. 3. Akileraartarnermut Aqutsiveqarfik naatsorsueqqissaarnissamik siunertamut atugassanik paassisutissanik amerlanerusunik pissarsiniarsinnaavoq, matumani ilaatigut akitsuummik akiliisussap piginnaassusia aamma unnuisut nuna najugaat.

§ 6. Neqerooruteqartartumut piffissaq eqqorlugu akiliisimannngitsumut Akileraartarnermut ingerlatsivik peqqusisinnaavoq, qaammatinit pingasunit sivikinnerusumik nalunaarsuinermik tunnusseqqullugu. Taamatut pisoqartillugu aningaasat § 3, imm. 1, nr. 1-im i taanneqartut piffissamut sivikillisamut naapertuuttumik apparinneqartassapput.

Imm. 2. Taamatuttaaq neqerooruteqartumut piffissaq eqqorlugu akiliinngitsumut Akileraartarnermut ingerlatsivik peqqusisinnaavoq, akiliinissamut piffissaliussaminngarnit § 4, imm. 2-mi taaneqartuminngarnit akiliinissamut piffissaliussaq sivikinnerussasoq.

§ 7. Akitsuummik akiliisussaq paassisutissanik eqqunngitsunik nassiusisimasoq taamaalillunilu akitsuummut ikippallaanik akiliisimasoq paasineqassagaluarpat, aningaasat akiitsukkat kingusinnerpaamik ullut 14-it qaangiunneranni akilerneqassasut piumasaqaatigineqassapput, akiligassanik kingusinaartumik akiliinermi ernialiussaasinaasut ilanggullugit.

Imm. 2. Akitsuummik akiliisussaq akitsuummut amerlavallaartunik akiliisimasoq paasineqarpat, aningaasat 300 koruunimik amerlanerusimappata utertillugit tunniunneqassapput.

Akitsuummik kommunit atuinerat

§ 8. Akitsuummut akiliutigineqartut kommunini ataasiakkaani unnuinernik nalunaarsorneqartut amerlassusaannut sanilliullugit kommunit akornanni agguanneqartassapput.

Imm. 2. Unnuinertut nalunaarsorneqartut amerlassusaat ukiumi ulloq 31. december akileraartarnermut ingerlatsivimmit naatsorsorneqartassapput.

Imm. 3. Akileraartarnermut ingerlatsiviup ukiup siuliini akitsuutit ukiup tulliuttup naanissaa sioqqullugu kommuninut akilertassavai. Aaqqissuussinermik allaffissornikkut aqutsinermut aningaasartuutinut matussutitut, ukiumut akiliutit katillugit 300.000 kr-nik apparinneqartassapput.

Imm. 4. Najukkami nunallu immikkoortuani takornariaqarnerup inerisarneranut unnuinermut akitsuummit isertitat kommunit taamaallaat atortassavaat, matumani sumiiffimmi takornariat amerleriarneranni kingunerisinnaasat pitsaanngitsut millisinnissaat ilanggullugu.

Imm. 5. Akitsuummit isertitat aamma aningaasartuutit akitsuummut matussusiisut, kommunip naatsorsuutaani allassimassapput.

Allaffissornikkut najoqqutassiat

§ 9. Naalakkersuisut inatsimmik uannga ingerlatsinissaq pillugu erseqqinnerusunik maleruagassiorsinnaapput, matumani akitsuummik akiliisussap paasissutissanik nalunaaruteqarnissaa ilanngullugu.

Imm. 2. Naalakkersuisut uppernarsaatit, taakku nuutinnerinik akitsuummik akiliisussap toqqortarinninnissamut pisussaaffi aamma akitsuummik akiliisussamut illuutinik attartortitsisoq pillugu paasissutissiussaatitaanera pillugit maleruagassanik aalajangersaasinnaapput.

Imm. 3. Naalakkersuisut akitsuummik akilersinneqarnikuusumit isertitanit kommunit atuisarnerat aamma naatsorsuutinik tunniussisussaaneq pillugu maleruagassanik aalajangersaasinnaapput, § 8, imm. 4-5 naapertorlugit.

Pineqaatissiissutit

§ 10. Inuk akiligassiisummik pineqaatissinneqassaaq, piaarluni imaluunniit sakkortuumik mianersuaalliorluni:

1) paasissutissanik eqqunngitsunik imaluunniit salluliutinik tunniussisoq imaluunniit akitsuutinik naatsorsuinermut tassanngalu nakkutilliinermut atugassanik paasissutissanik nipangiusseqqasoq, § 5, imm. 1 imaluunniit

2) akileraartnermut ingerlatsivimmut akitsuutit aningaasartaannik taggissanik ikinaarilluni nalunaarutiginninngitsoortoq, missiliuussinikkut akitsuutit annertussusaannik taggissanik nalunaarfigineqareerneremi kingorna kingusinnerpaamik sapaatit akunneri 4-t qaangiutsinnagit.

Imm. 2. Maleruagassiani, inatsisit una naapertorlugu saqqummiunneqartuni, inummut maleruagassiani aalajangersakkanik piaarluni imaluunniit mianersuaalliorluni unioqqutitsisumut akiliisitsinissaq aalajangersarneqarsinnaavoq.

Imm. 3. Ingerlatseqatigiffit il.il. (inatsisitigut pisinnaatitaasoq pisussaatitaasorlu) Kalaallit Nunaanni pinerluttulerinermut inatsimmi kapitali 5-imi malittarisassat malillugit pinerluttulerinikkut akisussaatinneqarsinnaapput.

§ 11. Naalakkersuisut naalakkersuisulluunniit pisinnaatitaasoq, Inatsisartut inatsisaanni matumani aalajangersakkanik unioqqutitsisoq nalunaarfigisinnaavaat, suliaq eqqartuussivikkoortumik malersuinertaqanngitsumik aalajangiiffigineqarsinnaasoq, pineqartoq unioqqutitsinermi pisuusutut nassuerpat aamma piffissaliussap erseqqinnerusumik nalunaarneqartup qinnuteqarnikkut sivitsorneqarsinnaasup nallinnginnerani nalunaarpas, akiligassiisummik taaneqartumik nassuerutigineqartumik akiliiumappat.

Imm. 2. Nassuernermet imm. 1-imi taaneqartumut tunngatillugu, Kalaallit Nunaanni eqqartuussisarnermut inatsimmi kapitali 38-mi maleruagassat, unnerluussutip imarisaaniittut taamaaqataanik atuutissapput.

Imm. 3. Akitsuut piffissaq eqqorlugu akilerneqassaaq, imaluunniit akuersissuteqarnerup kingorna akilersinneqarsimappat, malersueqqinnissaq atorunnaassaaq.

§ 12. § 10 imaluunniit § 11 malillugu akiligassiissutigineqartut Nunatta Karsianut nakkartinneqartassapput.

Atuutilersitsineq

§ 13. Inatsisartut inatsisaat ulloq 1. januar 2026-mi atuutilerpoq aamma ulloq taanna aallarnerfigalugu unnuinernut pissalluni.

Namminersorlutik Oqartussat, ulloq 25. novembari 2024

Múte Bourup Egede (atsior.)

Naalakkersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviit

Naalakkersuisut